

Midamo, missiès, cars ami,

D'en proumié vole gramacia la vilo de-z-Ais-de-Prouvènço, mèmbe dóu Forum d'Oc, que nous aculi uei pèr nosto cinquenco counvencion e pièi lis ami dóu Ciéucle Catalan de Marsiho, aderènt éli tambèn dóu Forum desempièi la debuto que nous an ajuda dins l'ourganisacion dóu prougamo pèr aquelo journado.

Arrivan dins la cinquenco annado d'eisistènci. Coumtan vuei 443 adesioun, repartido en 23 artistico (aderènt à titre individuau), 33 entrepresso, 34 coumuno e despartamen, 153 associacion vo sindicat, e 200 elegi (à titre persounau). Aquéli noumbre precis se podon verifica au countre d'àutri anóunco farfeludo e bèn pau escrepulouso.

Lou Forum s'es impausa coume uno forço de recampamen soulido ounte d'àutri privilegisson l'esclusioun e la divisioun. S'es impausa tambèn pèr sa reparticion sus l'ensèn dóu terrièr regiounau e enfin pèr soun serious dins soun engajamen de l'ensèn de si branco. Douno vuei l'interlocutour credible tant recerca pèr « lou mouvamen de proumoucioun de nosto lengo e nosto cultivo » au regard di poudé, di decidaire e meme dóu publi. Ço que nous mostro dos causo :

la proumièro qu'avèn bèn travaia,

la segoundo que nous rèsto encaro forço travail de realisa ensèn.

Aquelo proumièro partido de noste desvelopamen, meme se nous a demanda bèn de tèms e d'energìo, èro de segur la mens dificilo, qu'avèn sènso trop de mau pou scu recampa li qu'èron adeja lou mai naturalamen engaja e aqueri à nosto causo. Nous fau aro countunia e avança pèr de credible que sian deveni indispensable. Es lou sèn que l'equipo permanènto de Forum d'Oc a souveta douna au recampamen de z-Ais.

Li dos manifestacion annalo ourganizado pèr lou Forum soun

lou coungrès que a pèr finalita principalo de nous faire miés counèisse dóu publi,

la counvencion d'avaloura nòsti forço e d'amelioura noste founcionamen interne.

Aquéu founcionamen a evoulua desempièi la debuto e de tout segur nous faudra marca aquelo evolucion dins la Carto d'ourigino pèr quàuqui detai. Li tres grupo de travail qu'an moutiva nosto refleission soun arriba au bout de sa mession en tant qu'estructuro. An prepara lou travail di tres chantié ounte desenant cadun pòu trouva sa plaço e que caduno e cadun a de pensa à faire viéure d'esperéli. Cade groupe a de referènt que tenèn à saluda e à regracia pèr soun engajamen e que citant aro bèn vouldontié :

Gile Désécot, Reinié Martel, Oulivié Pasquetti pèr lou proumié ; Glàudi Holyst e Miquèu Benedetto pèr lou segound ; Mirèio Benedetti, qu'ourganiso e fai viéure nosto pajo Facebook emé Gui Liegeois carga dóu site internet, e óublidarai pas lou trio d'artisto Liza, Jan-Bernat Platevin e Andriéu Neyton pèr lou tresen. Tout aquéu mounde coustitui l'equipo permanènto de Forum d'Oc emé li representant dis associacion foundatriço e soun regulieramen counvida is acamp mesadié.

Dins aquéli chantié de travai, se se pòu dire, es marca l'ensèn de nòsto acioun founcieramen multiformo. Es aquelo de cadun di mèmbe de nòstis assouciacioun e groupe artisti emé si proujèt especifi, es aquelo de nòsti mèmbe elegi devers sis eleitour e di mitan ounte se desvelopo soun acioun poulitico, es aquelo dis entreprenèire toucant si clientèlo e si maiun pèr counfourta li soustèn de nòsti preócupacioun coumuno.

Noste devé de cadun es de faire que tout acò s'assèmbo, de faire barrula l'infourmacion, multiplica lis iniciativo. De tout segur es un óujeitiéu ambitious davans lou quau devèn jamai se descouraja.

La matinado de travai que vous prepausan es de dire que lou recampamen, d'un biais generau, repauso sus li rescontre. Prenèn lou parti de dire qu'es pousible d'interessa e de desvelopa li preócupacioun que soun nostro dins de mitan ounte soun que de ciblo segoundàri.

Lis assouciacioun catalanisto nous pourgisson dins aquelo endrechiero un partenàri privilegia, au regard di counvergènço, que despièi proun tèms fan freireja l'espàci Catalan e l'espàci ócitan-lengo d'o. Es subretout l'après dina que ié sara counsacra, en seguido dóu moumen festiéu e simbouli previst pèr la vilo de-z-Ais sus lou cop de miejour. Pèr lou tèms de aro anan entendre d'atour nous counta lis esfors que vous disiéu adès pèr nous durbi à de mitan que nous soun couneigu mai ounte avèn pas planta caviho. La matinado de travai s'acabara pèr un debat qu'esperan fruchau sus li mejan que nous faudrié desplega pèr fin d'assegura un sucès à nòstis entrepresso.

Dins li mitan que nous soun pas encaro acquis se trovo un doumaine maje : l'ensignamen. Sabès, se seguissès l'atualita, que desempièi quàuqui mes i'a agu à nosto sèns d'ataco seriouso contro li lengo regionalo e deve vous dire que sian atentiéu e restant pas sènso reagi, à tout ço que se debano pèr faire faire chi à-n-aquelo tempèsto.

De fa la trasmessioun en generau e aquelo de la lengo à la jouinesso es de tout segur la preócupacioun majo de Forum d'Oc, i avèn deja counsacra uno bono partido de noste tèms e vous anoncian que deja avans la reguignado menisterialo avian previst que lou cougrès de 2019 ié sieguesse entieramen counsacra.

Vai sènso dire que coumtan sus vautre tóuti pèr èstre presènt lou 5 d'óutobre à La Sagno (La Seyne, Var) pèr fin de i'assegura uno pleno reüssido.

E aro bon travai.

Gramaci.